



Dieu enuoye le Deluge Vniuersel, qui consomme toute ame viuante hors l'Arche.

SVIVANT ce que Dieu auoit commandé à Noé, il estoit entré en l'Arche avec ses enfans, y ayant fait aussi entrer les sept paires des animaux mundes & nets, & des immundes deux paires, males & femelles, afin que la semence en fust conseruée sur la terre vniuerselle. Aussi Noé auoit fait tout ce que Dieu luy auoit commandé, & auoit ja atteint l'âge de six cens ans quand le Deluge fut sur la terre. Or le second mois au dix-septième iour, les fontaines des grandes abysmes furent rompuës, & les cataractes & fenestres du Ciel furent ouuertes, & la vehemente pluye continua quarante iours & quarante nuits sur la terre, en telle abondance, qu'il fut fait vn Deluge vniuersel. Les eaux croissans de iour à autre, enleuerent l'Arche par dessus toutes les montagnes de la terre de quinze coudées de haut. Adonc perit toute chair qui se mouuoit sur la terre, tant volatilles qu'animaux & reptiles, & tout ce qui respiroit. Toute substance donc qui estoit sur la terre fut détruite, depuis l'homme iusques au reptile & volatile du Ciel. Mais Noé seulement resta, & ceux qui estoient en l'Arche, & les eaux courirent la terre par cent cinquante iours.